

PLOANIES SAN MARTIN Y LUNGIARÜ

Invit al Rorate dla Musiga en sabeda, ai 02/12, dales 19.30, a San Martin.

Al vëgn dit dër bel dilan a düc chi che á dé jö guant bel nèt y intier ala Caritas. An mëss constaté che ti sac vëgnel tres ciamó metü patüc che n'é nia da dé jö ala Caritas, ince tröc cialzá nia ciolá adöm che vá a perde y n'á degun valor.

SAN MARTIN

Invit ala incuntada di geniturs di mituns y dles mitans che vá l'ann che vëgn ala Pröma Comuniun en sabeda, ai 28 de novëmber, dales 19.30, tl salf de calonia.

Dötes les families é bel inviades en domënia, la pröma d'Advënt, da gni a festejé deboriada la gran mëssa y da porté la gherlanda d'Advënt a benedí.

Calënder d'Advënt "Sön tru incuntra a Nadé" cun dessëgns di mituns dla 3,4 y 5 elementara ite en chi Pinis, arjigné ca dala Uniun dles Ères. Dal 01/12 inant vëgnel impié vigni sëra pro i dessëgns na löm; al é da odëi cina ai 06/01. Gnidé a ti ciaré!

LUNGIARÜ

La Uniun dles Ères dëida recordé che chisc dis pón ciamó dé jö le zetl por la lïta dles ères tla scatora apé de dlïja. Prëitambel y dilan de osta colauraziun

En domënia, ai 03/12, é düc i ëi invia al Rorate dla Uniun. Dedô é düc i ëi invia i tl salf al referat cun le prof. Iaco Frontull y a na picia festa da Nadé.

La Ciasa de Palsa inviëia al referat dal titol "Maraties psichiches pro jënt de tëmp. Co pói pa me comporté cun chëstes porsones?" en jöbia, ai 30 de novëmber, dales 19.30, cun le referënt Fischnaller Markus da La Plí de Mareo (por todësch).

La Comunità comprensoriala Val de Puster chir families o porsones da daidé geniturs che adora momentaneamënter aiüt y sostëgn da ciaré di mituns. Le sostëgn pó ester a tëmp parzial o ince a tëmp plëgn. Sc'i sëis a öna da ti dé n secundo daciasa a n/a möt/a por n per de ores o ince por intant de tëmp contatede 0474/412925 o scriede a anvertraung.affidamento@bzgpust.it

Marcé da Nadé tl Zënter sozial La Spona a Pidrô en sabeda, ai 2 de dezëmber, dales 10.00 ales 17.00 cun creaziuns y decoraziuns fates a man, idees por scincundes da Nadé, gherlandes d'Advënt, lëgns da Nadé y tröp d'ater. L'Uniun di Ladins vënará libri, presentará sües publicaziuns nöies. Dales 14.00 inant gñarál lit dant stories por i pici. I essun dër ligrëza sc'i gnisses a nes ciafé.

Le Museum de Tor deura sües portes por les manifestaziuns dl "Tëmp da Nadé". Le museum pó gni vijité debann. Al vëgn pité da bëre y da mangé.

En sabeda, 02/12, dales 17.00 ales 19.00, sona scolars dla Scora de Musiga ti salamënc dl Museum de Tor. Por mituns y mitans vëgnel pité n laboratore creatif

Döt le bun a chi che complësc i agn de dezëmber

a San Martin Giovanni Frenner che nen complësc 81 ai 5

Maria Sorà Clara che nen complësc 80 ai 8

a Lungiarü Augusta Clara Deiaco che nen complësc 80 ai 7

Angela Sorá Daporta che nen complësc 86 ai 27



unitepastorala.org

Plata dles Ploanies San Martin y Lungiarü

ploan siur Klaus Sottsas 344 15 54 055 - ksottsas@rolmail.net

curat siur Heinrich Perathoner 339 65 74 213

redaziun: anton.gasser@rolmail.net - 348 27 44 517 / 0474 523 194

26.11. - 03.12.23 n. 53

ultimo termo por comunicaziuns: jöbia, dales 20.00

Domënia de Crist Re - A

Vangele do san Matí 25,31-46

Dailò ti dijara le re a chi a süa man dërta: Gnide ca, os benedis da mi Pere, tolede le règn, che é destiné por os dala creaziun dl monn incà. Deachi i â fan, y i m'ëis dè da mangé; i â sèi, y i m'ëis dè da bëre; i ê forest y zënza tèt, y i m'ëis dè alberch; i ê desnü, y i m'ëis vistì; i ê amarè, y i sëis gnüs a me ciafé; i ê te porjun, y i sëis gnüs da mè. Spo ti respognarà i iüsc: Signur, can t'unse pa odü arfamè y t'un dè da mangé o assetè y t'un dè da bëre? Y can t'unse pa odü forest y zënza ciasa y t'un tut sò, o desnü y t'un vistì? Y can t'unse pa odü amarè o te porjun y sun gnüs da tè? Sön chëra ti respognarà le re: Amen, i ves diji: Vigni ota ch'i ëis fat chëstes cosses incé mâ a un su de chisc mi mëndri fredesc, les ëise fat a mé.



I sun rová ala fin dl ann de dlïja y sc'i ciarun indô spo: Sunse stá muntri y atënc y unse tut en conscideraziun la situaziun di vijins? unse tut söl sciode sü bojëgns y ti sunse stá dlungia? O ne l'unse nia fat? L'atenziun y la compasciun defrunt al proscim é propi ci che cunta. Le vangele ne bagatelisëia nia, y Chël Bel Dî vëgn presenté bindebó sciode. Mo sura döt stá "Gnide ca, os benedis da mi Pere, tolede le règn, che é destiné por os dala creaziun dl monn incà." I vëighi chësta frasa sciöche la noela plü importanta de chësc vangele, che me consolëia y me fej reconescënta. I ne creii nia che Idî ais ligrëza da partí sò la jënt danter "prosc" y "ri". Dessigü n'él de chi zënza compasciun y cherianza y che ne s'un fej nia adinfora. Gnide, os benedis! Chësta n'é nia ma la noela zentrala, mo ince n invit ala vita, por me y por d'atri.

| EDEMA - ANN "A" | SAN MARTIN | LUNGIARÜ |
|---|---|--|
| 26.11.23 Festa de Crist Re Domènia de Santa Zezilia Patrona dla Musiga Sacra | <i>degöna corona</i> 10.00 Gran Mëssa por la comunité 3ª de sopolt. de Loise Ploner Unterwger + Sciandro y Hannele Trebo + Franz Canins (dl ann) + Friedl Clara | 7.50 Corona 8.15 Gran Mëssa por la comunité 3ª de sopoltöra de Severina Costa + + Rudi y Monica Moling por families de Albina Pezzei, Frëina |
| 27.11.23 <i>Virgile, Oda</i> Lönesc | | |
| 28.11.23 Dedolönesc <i>Berta, Günther</i> | 8.00 Mëssa por les families de Carmen Erlacher + Ida Dariz | |
| 29.11.23 Dedemesaledema <i>Iolanda, Iuta, Saturn</i> | | 7.30 Mëssa + Sepl Clara, Sanví dl ann + Berta Mischi dl ann + Paul Daporta + Nando Clara vis y def. Lüca y Hannele Sorà |
| 30.11.23 <i>André apostul</i> Jöbia | | |
| 01.12.23 Pröm vëndres <i>Natalia, Charles de Foucauld</i> | 18.30 Adoraziun chîta 19.00 Mëssa + + + Giovanni, Maria y Pia Trebo + + + Paul y Frida Vantsch, Clara Ploner | |
| 02.12.23 Sabeda <i>Luzius, Bibiana</i> | 19.30 Mëssa prefestia /Rorate por la Uniun dla Musiga por Karin y Daniel Schanung + + + Otto, Paola y Augustin Clement + Giovanni Unterweger | |
| 03.12.23 1ª Domènia d'Advënt B Domènia dla Dlijia te ciasa | 9.30 Corona 10.00 Gran Mëssa por la comunité por y cun les families - <i>al cianta n terzet</i> <i>Benedisciun dles gherlandes</i> vis y def. fam. Sepl Frenes, Preroman por families de Sepl y German Frenner + + Bino y Ottilia Pedevilla 14.00 Bato de Mattia Dejaco | 7.50 Corona 8.15 Gran Mëssa / Rorate por y cun les families por la Uniun di Èi por families de Albina Pezzei, Frëina por fam. Somví vis y def. families Maria Clara Dapoz, Ties vis y def. fam. Benedetto Clara y Luis Clara |



Döt n ater Re
Süa grandëza é ascognüda
tl bambin te na ciané;
süa potënza stá tl sorvisc;
süa forza se desmostra
tla deblëza por la jënt;
al n'é nia da ciafé pro chi alaingrana
mo pro i soferënc;
al é n re che n'é nia sura nos,
mo che vëgn cun nos;
n re che vëgn inalzé
söla crusc por nes salvé.



I tignun la festa de santa Zezilia, la patrona
dl cianté y soné de dlijia, y tolun l'ocajun
da ti dí dilan a düc chi che se dá da fá por
la musiga sacra, ai cors y ala musiga, ai
dirighënc, organisé, ciantarines y ciantadus,
musiconc y musicontres, ai cianturs y ales
cianturies, ai presidënc y ai comités y ince
a vignun y a vignöna che tol ca le liber y
cianta tla comunité. I èis fat ia por l'ann n
sorvisc dër important; cun osc cianté y soné
ëise incundé le lalt de Di y lié adöm la
comunité tla fede y tla oraziun.